

UVODNIK

I ovaj dvobroj “Znakova vremena”, što je inače jedna od prepoznatljivih crtica ovoga časopisa, posvećujemo još jednoj iznimno značajnoj intelektualnoj i duhovnoj figuri u islamskome svijetu petoga stoljeća po hidžri. Riječ je o Ahmedu al-Gazaliju, mlađemu bratu poznatoga Abu Hamida al-Gazalija, koji je dao nemjerljiv doprinos razvoju tesavufa i klasičnoga islamskoga nauka kao i perzijske književnosti i gnoze. Zahvaljujući nama čitatelji će imati rijetku priliku da se kroz tri teksta na bosanskome jeziku obavijeste o životu i djelu odnosno da se upoznaju sa karakterom njegovog mišljenja.

U odjeljku *Znanje i vjerovanje u djelima Attara Nišaburija* objavljujemo tekst iranskoga autora Alija Zaminija, koji otvara jedno veoma složeno pitanje kojim se bavila klasična muslimanska epistemologija, a to je pitanje izvora spoznaje u islamu. Autor na interesantan i za nas, rekli bismo, neuobičajen način razgraničava ono što pripada, naravno kada je princip spoznaje u pitanju, filozofiji, teologiji, pozitivnoj znanosti te iranskoj gnozi i sufizmu.

U trećem odjeljku *Religije, mir i tolerancija* donosimo dva teksta. U prvome naš gotovo stalni saradnik iz Republike Srbije Marko P. Đurić piše o toleranciji kao vjernik i to kroz fundamentalne izvore i povijesna iskustva kršćanstva i islama, dok u drugome tekstu imam i hatib iz Gračanice kod Visokog Samed Imamović daje odgovor na pitanje na koji način sljedbenici religija mogu dati svoj doprinos međunacionalnome pomirenju na prostorima Zapadnoga Balkana.

Četvrti odjeljak je posvećen najvažnijim zakonodavnim i izvršnim institucijama vlasti države Bosne i Hercegovine, o kojima veliki broj, gotovo smo sigurni to ustvrditi, ne zna mnogo ili skoro ništa. Objavljujemo dva teksta koja potpisuju Muhamed Mujakić odnosno Alma Močić-Mujakić, u kojima autori predstavljaju Parlamentarnu skupštinu i Vijeće ministara BiH, preciznije, njihove nadležnosti i način donošenja odluka, kritički se osvrćući na njihovo dosadašnje funkcioniranje, predlažući u funkcionalnome smislu određene promjene.

U odjeljku *Kritička sagledavanja* donosimo dva teksta. U prvome tekstu autora Remzije Kadrića se govori o Dejtonskom mirovnom

sporazumu i ulozi u tumačenju i dosadašnjim naporima u provođenju ovog sporazuma kao cjeline, u drugome tekstu Rizvan Halilović nastoji pokazati značajne vrijednosti Ustava Bosne i Hercegovine, posebno se zadržavajući na temeljnim ljudskim i građanskim pravima koja su u njegovu tekstu sadržana.

U šestome odjeljku *Refleksije* autor Bilal Hodžić na temelju vlastitoga životnoga iskustva i veoma konkretne primjere piše o krizi religijskoga identiteta Bošnjaka u Njemačkoj, dajući na jedan neuobičajen način prilog proučavanju stanja i perspektiva naše dijaspore u Zapadnoj Evropi.

Odjeljak *Ogledi* sadrži također jedan tekst. Njega potpisuje Senella Krehić-Fočak u kojemu se, posredstvom klasičnih djela, razmatra veza između sufizma i medicine. Tekst je interesantan ne samo zbog historijskih činjenica koje su iznesene, nego i zbog uporedne analize sufijske i medicinske literature znamenitih klasičnih autora.

U osmome odjeljku *Kulturno-historijske teme* objavljujemo tekstove Rosane Ratkovčić i Nadira Dacića. U prvome tekstu su izneseni brojni primjeri prisustva hamzevija u bosansko-hercegovačkoj kulturnoj historiji, dok se u drugom tekstu, na temelju opsežne arhivske građe, raspravlja o historijskim uvjetima i okolnostima nastanka *Beogradskog Gajreta* Osman Đikić.

Slijedi standardni odjeljak *Osvrti i prikazi* knjiga. U svojem osvrtnu pod naslovom "Reminiscencije i aporije demokratskog razvoja Bosne i Hercegovine" Fikret Bećirović predstavlja i analizira sadržaj knjige Mirka Pejanovića *Država Bosna i Hercegovina i demokratija*, koju je objavila IKD "University Press" - Magistrat izdanje, Sarajevo, 2015. godina. Nakon toga donosimo osvrt na knjigu *Dervishes and Islam in Bosnia*, autorice Ines Aščerić-Told, Leiden-Boston: Brill, 2015. godine, koga potpisuje naša saradnica Azra Gadžo Kasumović.

Ovaj dvobroj zaključujemo sjećanjem na rahmetli Muniba Maglajlića, jednog od obnovitelja i dugogodišnjega predsjednika BZK Preporod, velikog pregaoca u zaštiti i afirmaciji bosanskohercegovačke, a napose bošnjačke kulture i identiteta.

Adnan Silajdžić